



Халқ сўзи

Ўзбекистон — келажаги буюк давлат

2022 йил — ИНСОН ҚАДРИНИ УЛУГЛАШ ВА ФАОЛ МАҲАЛЛА ЙИЛИ

1991 йил 1 январдан чиқа бошлаган

WWW.XS.UZ

E-mail: info@xs.uz

2022 йил 27 август, № 186 (8248)

Шанба

Сайтимизга ўтиш учун QR-кодни телефонингиз орқали сканер қилинг.



ҚОРАҚАЛПОҒИСТОН РЕСПУБЛИКАСИ ЖЎҚОРҒИ КЕНГЕСИНИНГ НАВБАТДАН ТАШҚАРИ СЕССИЯСИДА ҚОРАҚАЛПОҒИСТОННИ ИЖТИМОЙ-ИҚТИСОДИЙ РИВОЖЛАНТИРИШНИНГ УСТУВОР ЙЎНАЛИШЛАРИ БЕЛГИЛАНДИ



Нукус шаҳрида 26 август куни Қорақалпоғистон Республикаси Жўқорғи Кенгесининг навбатдан ташқари ўттиз тўртинчи сессияси бўлиб ўтди.

Уни Жўқорғи Кенгес Раисининг ўринбосари Атабек Давлетов олиб борди. Сессиянинг котибияти сайланиб, кун тартиби тасдиқланди. Унга кўра иккита ташкилий масала кўрилди.

Қорақалпоғистон Республикаси Жўқорғи Кенгеси Раиси Мурат Камалов бетоблиги сабабли ваколат муддатини олдиндан тўхтатиш бўйича ариза билан мурожаат қилган.

Бу масала овозга қўйилди ва Қорақалпоғистон

Республикаси Конституциясининг 83-моддасига мувофиқ, Жўқорғи Кенгес Раиси Мурат Камаловнинг ваколат муддатини олдиндан тўхтатиш ва эгаллаб турган лавозимидан озод этиш тўғрисида қарор қабул қилинди.

Сессияда Қорақалпоғистон Республикаси Жўқорғи Кенгеси Раисини сайлаш масаласи ҳам кўриб чиқилди. Қорақалпоғистон Республикаси қончилигига мувофиқ, бу лавозимга номзод депутатлардан иборат Оқсоқоллар кенгаши

томонидан тавсия этилади. Шу боис Оқсоқоллар кенгаши тузилди.

Кенгаш аъзолари маслаҳатлашиб, Қорақалпоғистон Республикаси Жўқорғи Кенгеси Раиси лавозимига Оринбаев Аманбай Тлеубаевич номзодини тавсия этди.

Сессияда Ўзбекистон Республикаси Президенти Шавкат Мирзиёев иштирок этди.

Давлатимиз раҳбари ўз сўзида Президент сифатида олти йил давомида бошқа ҳудудларга нис-

батан энг кўп, яъни тўққиз марта Қорақалпоғистонга келиб, бу ердаги оқсоқоллар, тадбиркорлар, ёшлар вакиллари билан кўп-кўп мулоқот қилганини таъкидлади.

Ушбу даврда Қорақалпоғистонни комплекс ривожлантиришга қаратилган 31 та Фармон ва қарорлар қабул қилинди. Худудда тадбиркорлик субъектлари сони 2 баробар ортди, қарийб 4,5 мингта инвестиция лойиҳалари ишга туширилди.

Қорақалпоғистонда ичимлик суви таъминоти 40 фоиздан 68 фоизга, мактабгача таълим билан қамров даражаси 32 фоиздан 76 фоизга, аҳоли даромадлари жон бошига 2 баробар ошди. 2017 — 2021 йилларда 26 минг 400 та тураржой барпо этилди.

Аммо шунча саъй-ҳаракатларга, Қорақалпоғистонга ажратилаётган катта-катта маблағларга қарамай, ичимлик суви, ички йўллар, электр таъминоти, ишсизлик, нарх-наво каби масалаларда муаммолар сақланиб қолаётгани танқид қилинди.

Давлатимиз раҳбари номзодни лавозимга тасдиқлашдан аввал унинг муаммоларини ҳал қилиш ва худудни ривожлантириш бўйича режаларини эшитишни таклиф қилди.

Номзод Қорақалпоғистонда тадбиркорликни, аграр соҳани ва инфратузилмани ривожлантириш, саноат лойиҳаларини кўпайтириш, аҳолини ижтимоий ҳимоя қилиш, таълим ва ёшларни қўллаб-қувватлаш бўйича таклифларини баён этди.

Президентимиз бу таклифларни маъқуллаб, уларни амалга ошириш учун фақат Қорақалпоғистон учун фойда солиғи, айланма солиқ, мол-мулк ва ер солиғи ставкаларини 2 баробар қисқартиришга кўрсатма берди.

— Майли, маблағ бюджетга тушмасин, хонадонларга тушсин, — деди Шавкат Мирзиёев.

Пахта ва галла майдонларини қисқартириб, ҳар бир оилага 2 гектардан ер ажратиш, Нукус шаҳрида саноат технопарки ва туманларда тадбиркорлик зоналари ташкил этиш, йўлларни таъмирлаш, электр, газ ва сув таъминотини яхшилаш бўйича вазифалар қўйилди.

Президент Шавкат Мирзиёев Аманбай Оринбаевнинг раҳбарлик қобилияти, ватанпарварлиги ва инсоний фазилатларини ҳисобга олиб, унинг номзодига ўз розилигини билдирди.

— Сизнинг биттаю битта вазифангиз — халқни рози қилиш. Ҳар бир туман, қишлоқ ва овулларга кириб бориб, аҳолига муносиб турмуш шароити яратиб керак, — деди давлатимиз раҳбари.

Жўқорғи Кенгес депутатлари, жамоатчилик вакиллари сўзга чиқиб, номзодни қўллаб-қувватлади.

Саноқ комиссияси тузилди. Яширин овоз бериш йўли билан Қорақалпоғистон Республикаси Жўқорғи Кенгеси Раиси лавозимига Аманбай Оринбаев сайланди.

— Мана, юксак ишонч, катта умидлар билан янги Раис сайланди, — деди Президент. — Энди у адолат, садоқат, масъулият ва тартиб-интизомни ўз фаолиятига мезон қилиб олиши керак. Халқимиз бағрикенг. Ватан ягона! Бирлашсакгина, олдимизга қўйган улкан-улкан марраларга, албатта, етамиз.

Шу билан Қорақалпоғистон Республикаси Жўқорғи Кенгеси сессияси якунланди.

Сессиядан сўнг Президент Шавкат Мирзиёев Нукус шаҳридаги Амурдарё маҳалласини бориб кўрди. Бу ерда 6 минг нафардан зиёд аҳоли яшайди. 2 та саноат корхонаси, 20 дан ортиқ савдо ва хизмат кўрсатиш шохобчаларида одамлар иш билан банд.

Яқинда маҳалладаги ички йўллар, табиий газ ва электр тармоқлари таъмирланди. Ен-атроф ободонлаштирилди. Мактаб ва мактабгача таълим муассасаси қиёфаси янгиланиб, шароитлари яхшиланди.

Ушбу мактаб ҳовлисида маҳалла фаоллари, нурунийлар билан самимий суҳбат бўлди.

— Мен Президент сифатида бошқа ҳудудларга нисбатан энг кўп Қорақалпоғистонга келибман. Биринчи қадамларимиздан билдикки, паस्ता тушсак, бирлашсак, ҳаракат қилсак, ўзгариш қилса бўлар экан. Сўнгги йилларда Қорақалпоғистонда катта янгиланиш бўлди. Ичимлик суви таъминоти яхшиланди, мактабгача таълим қамрови ошди. Кўплаб уй-жойлар қурилди. Бундай ўзгаришларни сизларнинг маҳаллангизда ҳам кўриб, хурсанд бўлдим, — деди Шавкат Мирзиёев.

Нурунийлар июлда юз берган воқеалар катта хато бўлганини, айрим ёшлар адашганини айтдилар. Асрлар давомида қорақалпоқ ва ўзбек бир тану бир жон бўлиб кетганларини таъкидлаб, халқимизга тинчлик-омонлик сўраб дуо қилдилар.

— Албатта бу барчамизни қаттиқ ташвишга солди. Бу ҳодисалар Қорақалпоғистон халқининг хоҳиш-иродаси эмасди. Қорақалпоқ элининг виждони пок. Халқимиз «эт билан тирноқ». Илоҳим бундай кўнгилсизликлар бошқа бўлмасин, юртимиз тинч, оғизбирчилигимиз абадий бўлсин, — деди Президент.

Шу билан давлатимиз раҳбарининг Қорақалпоғистонга ташрифи якунланди.

Ў.А.

Ўзбекистон Республикаси Президенти Матбуот хизмати сурати.

Ифтихор

МИЛЛАТ БАХТИН СЎРАР МИЛЛАТ ОТАСИ



Сирожиддин САЙИД, Ўзбекистон халқ шоири

Оллоҳ номи билан бошладик калом, Оллоҳ даргоҳида энг олий инъом, Келдик — дил ва тилда лаббайка, салом, Бандага раводир Ҳақ ҳидояти, Бизга насиб этмиш Байт зиёрати.

Лак-лак одамзодни яратган Эгам, Меҳру карамини таратган Эгам, Оламини бир жойга қаратган Эгам — Минг-минг ҳикмат эрур бир ишорати, Бизга насиб этмиш Байт зиёрати.

Юргандик умрнинг ўйлови билан, Ногоҳ Худойимнинг йўлови билан, Ердаги соясин қўлови билан, Ҳақ ижозати ҳам Ҳақ иродати — Бизга насиб этмиш Байт зиёрати.

Мадинатун Набий, мунаввар шаҳар, Азалдан то абад музаффар шаҳар, Ўзинг дийдорига қилдинг муяссар. Порлоқ манзилларнинг нур ҳикояти, Бизга насиб этмиш Байт зиёрати.

Муборак равзада айлаб дуолар, Бўлмасин деб ҳаргиз бало-қазолар, Юрт эгаси сўрар элга зиёлар, Раббим соясидир — эл ҳимояти, Бизга насиб этмиш Байт зиёрати.

Муҳаллис боболар руҳига қасам, Сеҳру ҳикмат тўла дунёи азим. Маккатилло сори айладиқ азм, Бўлмас зиёратнинг кўп, зиёлати, Бизга насиб этмиш Байт зиёрати.

Умр — инсоннинг бир саёҳатидир, Умра — Байтуллоҳнинг зиёратидир. Имону эътиқод риюятидир. Тилларда Қуръоннинг қалб қироати, Бизга насиб этмиш Байт зиёрати.

Уйингга бош уриб келдик, ё Оллоҳ, Сен биздан огоҳсан, биз қайда огоҳ. Ё қодир Оллоҳим, ё Каъбатуллоҳ, Қалбнинг роҳати ҳам қалб риёзати — Бизга насиб этмиш Байт зиёрати.

Нажот эҳромини биз ўраб келдик, Энг аввал эл-юртга бахт сўраб келдик, Кетмас тожу давлат, тахт сўраб келдик, Бордир ҳар дуонинг ўз ижобати, Бизга насиб этмиш Байт зиёрати.

Миллат бахтин сўрар миллат отаси, Кўзлардаги ёшлар — дил ифодаси. Бунда ниятларнинг йўқ ниҳояси. Мақсад — юрт толеи, халқ саодати, Бизга насиб этмиш Байт зиёрати.

Саждага бош уриб одил Раҳнамо, Тинчлик-омонлик деб айлар тавалло. Ёш авлод камолин сўрар аввало, Халқ учун бўлди бу Ҳақ шафоати, Бизга насиб этмиш Байт зиёрати.



Ўттиз йилдан буён қутилган ташриф, Ўзинг эл мақомин айладиқ шариф, Имом Бухорийдан таҳсин ва таъриф — Ҳақ шарофати бу, Ҳақ инояти, Бизга насиб этмиш Байт зиёрати.

Муфти ҳазратлари ҳозир-нозирлар, Дуога қўл очиб турар вазирлар. Минг йиллардан сўнг ҳам бунинг ёзурлар — Янги замонларнинг зар китобати, Бизга насиб этмиш Байт зиёрати.

Ўтган ота-бобо, оналарни ҳам, Ўзинг раҳмат қилгил, айлагил қарам. Жаннат тўрларидан жой бергил, Эгам. Оналар учундир қарз тиловати, Бизга насиб этмиш Байт зиёрати.

Сендан умидвор зор кўнгиллар учун, Заҳматқаш оналар, сингиллар учун, Муқаддас Каъбанинг кўрсатил кучин, Ўксик дилларгадир меҳр ояти, Бизга насиб этмиш Байт зиёрати.

Кимлар бу кунларга етиб-етмаган, Асрлар армони дилдан кетмаган, Ҳазрат Навоийга насиб этмаган, Неҳир бу ўқинчнинг сир-синоати? Бизга насиб этмиш Байт зиёрати.

Шу боис, олийшон мезонларни ҳам, Подшоҳу валиаҳд султонларни ҳам — Ўзинг даргоҳингда қилгил муҳтарам, Хурмат-эҳтиромни ҳам итоати — Бизга насиб этмиш Байт зиёрати.



Эл-юрт барчамизга жону жаҳондир, Ота макондир ҳам бобо макондир. Ватан, она Ватан Ўзбекистондир — Шавкатли зотларнинг шаън, шижоати, Бизга насиб этмиш Байт зиёрати.

Эзгулик туғини баланд туттаймиз, То дунё тургунча ҳушёр ўттаймиз, Йўлбошчи ёнида бедор ўттаймиз, Ватанин севмоқлик — қалб диёнати, Бизга насиб этмиш Байт зиёрати.

Жидда — Маккаи мукаррама — Мадинаи мунаввара — Тошкент

